

四庫全書

集部

欽定四庫全書

集部

兩宋名賢小集卷一百三十五至
四十

詳校官中書_臣 閔思毅

助教_臣 常循覆勘

總校官編修_臣 王燕緒

校對官編修_臣 何循

謄錄監生_臣 邱繹曾

欽定四庫全書

兩宋名賢小集卷一百三十五

宋 陳思 編

元 陳世隆 補

茗溪詩集下

方欲相約為孔侯溪上之遊忽辱佳篇復次元韻
山色溪烟淡墨成隔溪幽鳥自呼名未妨濁酒陪心賞
更借清詩作眼明桃葉不關今夕恨竹枝猶是古時聲

扁舟醉後從漂泊個處應無寵辱驚

次韻奉酬元渤見過奕棊小飲及觀館閣題名之

作

珠玉當年歎唾成元劉何自敢齊名夢回雲海西崑遠
春到江村北渚明誰為少陵償酒債更憐侯喜得詩聲
杯中賢聖君休問局上光陰我獨驚

次韻鄭維心見貽一首

身病何因到赤墀眼昏不復下書帷杯觴有限長羞澁

故舊無多足別離對白抽黃餘習氣看朱成碧記當時

看朱成碧醉中眼施粉太白樽前人此維心舊詩僕初相識時所見也

江村投老俱牢落

猶喜詩情似拾遺

次韻方允迪祕監會稽相遇懷吳興舊遊二首

故山疇昔奉英遊老去功名失路頭江海一官如許冷

田園三載不知秋謝公塘外千峯紫何楷廬邊一徑幽

心折少陵存歿句恨無酒力破牢愁

舊遊方時敏吳亦虛皆已物故

鑑湖列嶂自天開雲色嵐光入酒杯忽遣同遊有陶謝

故應交契擬陳雷他鄉日日典衣醉公事時時牽馬來
要買扁舟窮勝絕共追樵徑曉風回

從謝仲謙乞猫一首

昔人蟻動疑鬪牛我家奔鼠如馬羣穿牀抵席不得寐
齧噬編簡連悅怱主人瓶粟常挂壁每飯不肉如廣文
誰令作意肆奸孽似怨釜鬻無餘葷君家得猫自拯溺
息育幾歲忘其勤

仲謙云水中得棄猫
拯救久之乃復活

屋頭但怪鼠迹

絕不知下有飛將軍他時生因願聘取青海龍種豈足

云歸來堂上看俘馘買魚貫柳酬策勛

待潮浙江口寄左與言大夫葉元亮學士兼簡吳
似之太史

今日江頭雪欲作濤怒風豪雨噴薄青鞵黃帽湖海人
獨立沙邊如病鶴閒身不待君賜與擬占風烟佳處著
如何寸祿晚見招踉蹌欲前還欲却翩翩西湖兩公子
胸次崢嶸飽丘壑糟牀夜注喜相報自發清吟侑觴酌
我來一笑豈易得十載湖山負佳約間闕百態成底事

毛髮星星已非昨人間俯仰變今古總似潮生與潮落
會須乞取此身健在眼好山俱著脚頗聞神方能却老
肯輔衰殘殊不惡因聲更約吳太史石鼎他年煮仙藥

舍弟出家作詩貽之

在家情已疎出家終不惡不有清淨緣云何脫微索我
昔志一官謂足世味樂顛倒十年間如蠶竟自縛業已
無奈何勸汝莫莫莫一漚非全潮起滅皆妄作當知是
身浮流浪恐非託伎倆百不好攝念乃初學如病求真

醫安知是良藥

送鄒德章教授之官合肥二首

晚色溪亭路風帆去莫遮
交情寄桑落離恨渺天涯
志行今誰及聲名莫漫誇
淮人問規範說似道卿家

古寺疎烟裏因依孰並游
敲行如短李邂逅得髯鄒
皎月林塘夜清霜雉兔秋
從今兩相憶一酌酌儂不

次韻沈次律家並蒂芍藥一首

習家池館酒如淮為破幽人一日齋
前廡芳菲駢蒂萼

後堂鶯燕嘯朋儕忽驚暗綠將成幄却喜雙紅欲綴釵
草木曾為門戶慶而今蘭玉已當階

次韻沈必先尚書見別一首

翩翩旗尾破新晴頗似龍駒脫在垆再上封章辭雨露
故令高節煥丹青卿雲媚日懷仙隱白鷺迎舟宿晚汀
豫想山齋春酒熟可無殘夢到南屏

家姪季高作詩止酒戲賦二首

淵明出從仕務亦計秫田一朝倦束帶唾棄如飄烟無

酒每從人茲事若可憐醉來便逐客卿去我欲眠了知
此賢胸醒醉皆超然胡為遽止酒而作止酒篇此身後
萬物不使一物偏有偏即是累在性皆非圓我樽可亡
酒我琴故無絃攜琴玩空樽唯我樂也天

淵明賦止酒子酒未嘗止今朝詩固云從此真止矣我
觀他日詩說酒特未已必飲誠有累必止亦非理無如
作病何聊用忘憂耳得失定相半隨過無彼此胡為我
阿咸深拒堅壁壘子言故多師烏有與亡是獨此止酒

詩字字如信史恐子昧圓通未究真止義常觀諸世間
一一等幻戲死生尚云爾何乃較醒醉操觚起相從無
為之吾事

方時敏寄和詩復用韻報之并簡季高理前止酒
之語季高嘗夢蕭相國戒勿飲酒

疇昔城南隅蓮葉秋田田從公觴玉醪醉墨看雲烟我
乃世背馳公獨肯顧憐追思十年夢僅熟一覺眠念當
老偏舟生理師計然不意菰蘆中復見瓊瑤篇筆力如

置陣彌縫認先偏從容步武間左右方若圓大如清廟
音三嘆聞疏絃安得化為雲追逐飛上天

阮籍劉伯倫嗜酒不知止顛狂欲求名此計真陋矣酒
中有何好正自未能已愁來得暫驅洞若適妙理我豈
沈酣徒公亦聊爾耳世間等夢間未悟彼易此阿高志
特殊家學自中壘嗷嗷求獨醒今昨較非是無心窮酒
聖有意造詩史自言古鄼侯告戒存密義逡巡若神授
恍惚類兒戲不須更論酒春夢本如醉我知昴星精不

管太白事

贈道人王生一首

夜來清商入梧桐策策不已鳴霜風故園一碧萬烟樹
慘淡已有傷秋容嗟哉造物本何意安得永賴長養功
我獨冷眼閱榮悴心與日出清霜融子奚不求助我喜
甕頭春風生麴米人間有酒誰不醉知其天者我與子
我身雖無雙羽翰欲將夢到三神山借爾八尺龍須席
遽然一覺俱飛還

天長道中作飢來驅我去一首寄呈劉盧二御史
飢來驅我去去去復何如我飢亦何慙所嘆為此軀明
發著征衫薄暮投郊墟烟林號怒風牛背立飢鳥境惡
夢多悵愁孤鬱難紓念初別鄉邦短檝穿菰蘆眼中兩
御史炯炯冰在壺清遊失追攀負此山繞湖我行日已
西回首風牽裾兩公飫文章筆端吐新腴願言寄殘膏
龜腸正空虛

張侔生辰作質龜相鶴二詩為壽

神龜異生稟懷抱黑

缺

月蹢躅守叢

缺

游戲引蓮葉青

雲覆其上文字書左脇千年愈堅瘦腹背類璆鐵有如
威德士秉志厲霜雪不求赫赫名羞作翕翕熱行藏開
理亂閱世自明哲時哉此唐虞負圖追往謀

黃鶴初出胎骨格已驚衆翩翩謝羣塵颯爽自神縱朝
飛出芝田夕飲下雲夢寧知風露質乃係世輕重有如
賢達人胸腹抱空洞觀時自隱顯豈待吹噓送會看九
臯鳴一一律呂中閱歲千六百羣飛接鸞鳳

千六百年
飲而不食

與鸞鳳同羣
見相鶴經

次韻鄭維心貽盧叔才一首

朝行轉木未暮返循水涯生長山水間
途窮自知歸萬緒更擾擾衆目何睽睽
有若脫羆牛邂逅得此時坐念盧夫子
與世真背馳讀書如董生三載圃不窺
清詩見真情觀者豈得疵春風入閭巷
爛漫百草菲摩腹忽起行菜茹傷蕨薇
平生經綸學無術取世資貧交可相覓
叩門兩無疑富貴不汝求我至君勿揮

次韻維心赴次律賞芍藥一首

巖前紅藥媚深幽更爲餘春一笑留
疇昔鄒枚俱倦客而今陶謝得同遊
真香雨裏來無盡粧艷風熏喜欲浮
未羨木奴千戶比主人原是醉鄉侯

留題呂宣義知命小園一首

雖無萬竹等封侯半畝清陰趣自幽
松韭尚能供早晚菊蘭聊欲記春秋
歸來久已同彭澤休去寧須問石頭
短褐飄零嗟我老他年來往亦風流

--	--	--	--	--	--	--	--

欽定四庫全書

兩宋名賢小集
卷一百三十五

九

兩宋名賢小集卷一百三十五

欽定四庫全書

兩宋名賢小集卷一百三十六

宋 陳思 編

元 陳世隆 補

陳子高遺稿

陳克字子高臨海人紹興中為敕令所刪定官自號
赤城居士僑居金陵有天台集

寧王進史圖

上林風暖脊令飛玉帶花驄侍讌歸汗簡不知天上事
至尊新納壽王妃

善財參自在天

善財得法猶兒子工巧仍參自在天若悟菩提同戲事
不應縛律更枯禪

題趙次張所藏賊頭子二首

揚鞭指點萬貔貅打取盧龍十四州煩君為發祿山塚
看我快飲月氏頭

龍章鳳姿世不乏東手無奈于此缺丹青王會何須爾
頸血淋漓送藁街

畫梅花

溪路模糊半山雪暗淡寒梅一枝月醉眸無處認冰姿
兩袖香風更愁絕長恨飄零如楚雲夢中猶記好精神
忽逢冷艷冰綃上歎息侯家占好春誤人吹裂柯亭笛
豈有殘英落綺席始信壽陽人寫真不知江南近消息

跋趙朝議江行初雪圖

我本孤舟蓑笠翁雪屋烟樹一生中如今不向江湖去
關艦旌旗照水紅

雪岬圖

大年貌得寒江雪鳬雁沙頭野
杓微箇裏有詩誰會得
情知不道一蓑歸

江南山色

筆間烟雨漫愁人不是溪山自在春
一段江南好風景
夕陽花塢淨無塵

謝曹中甫惠著色山水抹胸

曹郎富天巧發思綺紉間規模寶月團淺淡分眉山丹
青綴錦樹金碧羅烟鬟爐峰香自湧楚雲杳難攀政宜
林下風妙想非人寰飄蕭河官步羅抹陵九關我家老
孟光刻畫非妖媚綉鳳褐顛倒錦鯨棄榛管忍將漫汗
澤敗此脩連娟緘藏寄書篆曉夢生爛斑

題趙宜興萬里江山圖

慘淡何人畫飄飄萬里心雲輕春樹暗日落暮江深細

酌淵明酒仍彈子賤琴知公湖海氣對此益駸駸

與叔易過石佛看宋大夫畫山水

霜落石林江氣清隔江猶見暮山橫箇中只欠崔夫子
滿帽秋風信馬行

大年流水繞孤村圖

少游一覺揚州夢自作清歌自寫成流水寒鴉總堪畫
細看疑有斷腸聲

唐人畫牡丹圖二首

重樓傑閣上烟霞戟帶飄飄護翠華
侍女番休春醉著不知野鹿犯宮花

殘紅通白及時開不費君王羯鼓催
玉笛重拈天一笑外邊蜂蝶等閒來

伯時四騎

弱毫寸紙有餘地如見天閑八尺龍
坐想時危真致此兩軍旗鼓噪西風

曹夫人牧羊圖

日長永巷車音細，
插竹灑鹽紛。
妬恃美人零落涇水寒，
兩鬢風鬟一揮涕。
朶毛解解與人羣。
兒女恩怨徒紛紛，
洞房那復知許事。
但畫遠收連空雲。
榭葉飄蕭晚風勁，
殺雞相追寒鵲並。
短童何處沙州深。
族走羣飛各天性，
向來鞍馬曹將軍。
文采班班今尚存。
林下夫人更超絕，
新圖不作五花文。

觀錢德嘗書畫

臨池競賞無心筆，
破產新酬沒骨花。
老子眼寒俱不識，

勞君煎點入香茶

奉題董端明漁父醉鄉燒香圖十六首

漁父七首

處處晴沙著釣綸
浴鳬飛鷺頗相親
誰知夙昔風雲會
只似尋常江海人

鱗縷絲絲雪色魚
碧筍香細到村沽
江天此樂誰無分
不問官家乞鑑湖

君王獵罷載熊羆
錫壤分茅合霸齊
邑有魚鹽太多事

脩然何似釣璜溪

傾吳佐越早經綸朝市風波猛乞身不道五湖春浪急
蓬窓還有捧心人

志和漁隱古仙真雪水風流見後身蓑笠何須訪圖畫
貂蟬凜凜在麒麟

雷澤田漁翊聖明射蛟南幸見升平稍分天漢昭回象
更和江湖欸乃聲

風烟回首釣魚臺巾褐從容小殿開自是玉皇香案吏

外邊休奏客星來

醉鄉七首

醉鄉天地誰開闢
光景冲融古到今
明月清風一長嘯
杯中時見昔人心

昔人愛酒復能詩
阮籍陶潛蓋有之
共道尚書兼此興
超然異代忽同時

斗酒百篇元祐初
當時流輩已蕭疎
閉門日飲身強健
得見昇平總不如

子房帷幄贊神謀
晚歲疏封自占留
代邸勛勞今絕口
上恩仍與醉鄉侯

脫靴神氣迴飄飄
平日千鍾奉帝堯
老子浮沉人不識
酒壚爭席奈漁樵

老瓦盆中旋潑醕
陶然樂聖且銜杯
只今痛飲誰能那
寶器恩從天上来

黃金細字勒杯巡
魚水恩私晚更親
但得賜田堪種秫
向來浮議不關身

燒香二首

相如綠綺有新聲
荀令熏爐非故情
曲罷空山滿香霧
飄然還上赤霄行

琴心非佛亦非仙
座下絃歌萬二千
一瓣香中誰會得
要須靈剎散花天

題葉碩父畫卷二首

扁舟欲向山陰去
端為林泉作此行
不獨卷中攜栗里
還于句裏得淵明

風烟幻出元暉畫林壑天然碩父詩只似無心雲出岫
輪囷蕭索更多姿

題張文潛畫帖

此老從來馬如狗却笑蹇驢難朝天聊爾據鞍猶覓句
想知行處似乘船

官曹文書堆滿牀憤憤度日孤晝長安得如彼二三子
抱琴挾策置我旁

何伯言畫

何子畫山心極苦不畫山林畫其趣不知此絹厚幾許
隱隱深入疑有路去年持此千貴權數幅得官仍得錢
平民常產賣有盡筆端有產無窮年而今束絹知何數
不為水墨為襦袴我憐何子老更癡平民皆飽汝獨餓

兩宋名賢小集卷一百三十六

欽定四庫全書

兩宋名賢小集卷一百三十七

宋 陳思 編

元 陳世隆 補

拙齋別集

王 失名 字子思行履無考

德清宰俞居安自畫淵明圖

門無車馬喧徑有松菊陰前牕面清泚後戶依巖岑就

使世俗工猶足寫幽深況今令尹賢洞照先哲心出處
異軌轍丘壑同胸襟予知淡筆墨良似無絃琴先生如
明月瑩潔照古今形模或能寫光彩詎可臨寥寥千古
意當向筆下尋人心去典午朝柄歸卯金豈無康濟心
且賦歸來吟天生卓犖姿豈是甘山林當今急英賢四
海待商霖勉哉就功名枯槁不足欽

表兄丁行之俾予作山水一軸

禿髮管城書不中麝煤滿硯隨輕濃煙雲變怪本無定

丹青故匪能形容解衣盤礴無人久妙迹于今復何有
揮毫要使真宰泣嘆息初非癡絕手遼東有人丁令威
去家得仙今暫歸上界繁華異丘壑安得長林大麓長
追隨聯翩大軸要予寫鼓水不在鵞溪下吾既不能為
喬松直榦摩蒼天又不能為小童一線飛紙鳶萬里江
山入平遠喚取畫師闔立本

江侯邀予作山水書以贈之

江侯樂山水誓卜山水居遊戲天目道箬帽跨蹇驢村

童習識之拍手笑且呼行行不之顧心與山水俱于茲
且幾年所得應有餘云何不知厭要予寫諸圖昔者少
壯日戲墨謾妻奴今衰眼目暗筆研久已疎書來不得
謝督迫疇敢徐圖成不自識濃淡恣所如雲深霧莫測
中恐藏於菟人生孰非幻作觀隨有無江侯樂山水何
考其真歟作詩調江侯江侯其曉諸觀畢勿遽棄晉覬
尚可糊

何源秀才為予畫山水圖覓詩

孤峰特立何巉巖勢與霄漢光相參左蟠右列分巖岫
儼若至尊朝子男怪余蝸室不函丈欲有異境超塵凡
素縑掛壁故妥帖平地作此千嵌岩雲蒸霧結深莫測
長林大麓亂不芟想當變怪蟄龍虎中有窟穴誰能探
將崩未崩江石動欲去不去風滿帆山坳林闕見天際
隱釣萬里橫煙嵐嗟予質性素山野視此丘壑心益耽
斗升之粟真秣莩野馬垂耳就轡銜西山爽氣日在望
吏卒侍側嚴若監青鞋布襪棄不著誰令自苦披青衫

頗羞漁父駐短棹似笑大夫新被讒寄言鳥獸倘可侶
吾將從汝棲林巒

戲畫古松真清齋前

輪囷復離奇不柏亦不栗吾廬非夏社嘉樹伊誰植剝
心謝吹噓強骨餘霹靂崢嶸歷風霜偃蹇豈朝夕客從
何方來一覩心眼惑怪此蒼蛟龍落寞依屋壁不知造
物工輸寫入筆力輕明絕纖埃冥晦滴濃墨皮堅散鱗
甲葉老攢矛戟古工缺不師揮掃恣淋漓槃礴醉且狂

詎識韋與畢雖云不造極要自出胸臆當知後凋操不
在翰墨迹地瘠山骨出天低雲氣逼俯仰輒有碍巨榦
那能直翻令棟梁姿鬱屈自跼蹐安得少陵絹一掃二
千尺會看十八公高壓三品石

戲畫松栢壁間

窮山數家聚官況若羈旅冰廳晝日永眇眇誰與語眷
彼蒼髯生結友得新甫奮筆寫瑰姿雙虬見墻堵飽霜
柯葉老積石皮骨古上有雲垂天慘淡閣寒雨下有溪

漱石滄確絕埃土材奇生長艱根瘦卓立苦交柯寒相
依雷陳共然許分幹或相避蘆蘭馴兩虎信非同根生
要是歲寒侶衆木猥連林噲等何足伍君看桃與李穠
麗相媚嫵情態能幾時紛紛可堪數

兩宋名賢小集卷一百三十七

欽定四庫全書

兩宋名賢小集卷一百三十八

宋 陳思 編

元 陳世隆 補

梁溪集上

李綱字伯紀邵武人登政和二年進士第宣和中歷
尚書右丞高宗即位拜右僕射兼中書侍郎卒諡忠
定有梁溪集一百二十卷

松江第四橋

舟人云橋下有老蛟以後赴沙陽謫所作

松江第四橋風雨不可過下有百尺蛟蜿蜒枕橋卧窟宅據要津口腹長饑餓每憑波濤勢能作舟楫禍安得飲飛手坐使神姦破往來永無虞時鼓清江柂

雜興三首

邑犬驚行客林鳥啼曉霜山村雲冉冉澤國水茫茫移櫂輕舟穩釣簾野興長誰知因謫宦得向水雲鄉

蕭蕭歲華暮霏霏烟靄深輕冰依淺渚寒日映疎林故

邑懷親日扁舟去國心凝眸無限景愁絕不成吟

暮天來遠色行客尚貪行擢急浪花碎月高雲縷輕巢
烏棲更起漁火暗還明獨寢不成夢夜寒聞雁聲

韓賈

退之守潮陽戚嗟見章表賈生赴長沙自廣託鵬鳥拘
達言雖殊均為未能了今我謫龍津筦庫素所曉粗令
職事辦便覺溪山好燕坐一室間妄念悉除掃豈復計
窮通端亦忘壽夭回觀古人心頗嘆二子小

田家

江村烟火遠茅屋兩三家
斷岬垂衰柳疎篁隱細沙
田疇穰稻網罟足魚蝦
不識宦遊味見人還嘆嗟

嘉禾道中遇夏侯子陽

京華契濶已再冬
扁舟野岬欣相逢
天寒水遠飛霜風
談笑坐覺迴春容
年踰七十兩頰紅
真氣上泝泥九宮
剖符南海窺祝融
欲求丹砂訪葛洪
問予執筆侍九重
胡爲謫墮溪山中
迂愚久合親耕農
君恩未報徒忡忡

飄零孤跡隨斷蓬他日相憶看雲鴻

初到臨平見山

孤舟渺渺兩山間終日鉤簾只看山落日半銜霞未散
疎林遠暝鳥初還淒涼離恨誰能寄浩蕩詩愁自莫刪
賴有青山可人意與君相對且開顏

小雨

小雨晚初急暝雲深不收霏霏暗煙樹索索響篷舟山
色增遙翠漁蓑生暮愁淒涼蘓季子寒覓敝貂裘

靈隱宮

我昔曾遊飛來峯白猿畫掛峯上松
曄然靈光如彩虹
鐘磬自響金仙宮
宦遊漂泊西復東
雖欲再到無由從
帝居鈞天陋瀛蓬
螭坳載筆侍重瞳
逆鱗聊試摩神龍
謫墮劒浦山重重
征鞍來此尋舊踪
恍如夢落烟霞中
寒泉幽石欣相逢
門前池館虛含風
一洗塵慮清心胸
明朝南去隨征鴻
惆悵勝遊回首空

自哂

自哂何爲者南遊亦偶然未登離垢地端有散花天遇
境聊爲戲安心不離禪幽懷誰與共深炷一爐烟

渡浙江

理櫂適桐江隨潮過魚浦山寒雪猶積江迴月初吐御
氣凌煙霄乘槎渡星渚空濛老龍吟髣髴翠蛟舞境清
人自愁夜靜氣尤古獨坐不成眠霜晴聽津鼓

桐江行贈江致一少府

放浪江湖乃吾樂羈束軒冕非所榮謫官去爲劔浦吏

鼓枻遂作桐江行
艤舟浙岬候潮至
百越微茫烟水外
波橫天際海倒流
噴雪驚雷聲震地
須臾風軟潮已平
片帆去逐飛鴻輕
櫂謳四起日西落
暮天杳杳惟參橫
江山蒼蒼負殘雪
江水茫茫浸寒月
誰云逐客苦淒涼
今我斯遊最竒絕
清晨弭櫂桐君廬
溪光山色世所無
故人見我一笑粲
殺雞為黍聊相娛
嗟予仕宦等遊戲
斷梗飄蓬本無蒂
但令景物供吟哦
出處窮通何足計
此行幽討殊未闌
滿目疊疊皆雲山
鷺飛魚躍石齒齒

今夜且宿嚴陵灘

偶題

日照溪光碧起鱗
溪頭雁鷺自成羣
可憐獨鶴歸何處
萬里相隨一片雲

江南三咏

江南竹霜霰歲寒依舊綠
誰向溪邊養擇龍
滴露搖風
一林玉

江南梅昨夜溪頭玉雪開
贈遠欲傳千里恨
和烟爲折

欽定四庫全書

一枝來

江南客鬢髮蒼浪不可摘
明時遷逐念前非
一夜愁吟霜月白

鵲湖昌長老詢予來歷以詩答之

休問西來意
吾行日向南
悽悽達磨識
歷歷善財參
舊事已不憶
新交寧易談
維摩本無語
非是學三緘

趨真亭

烟霞深處一亭閒
石磴縈紆紫翠間
但覺峰巒勞顧揖

不知身到武夷山

遊仙溪

一溪九曲貫羣峰
演漾輕舟淺碧中
杳如誤入武陵去
落花流水山重重

兜擔石

仙人戲賭翠蛾眉
空有花輿照夕暉
雲月娟娟風嫋嫋
尚疑玉質在簾幃

學堂巖

欽定四庫全書

仙官讀徹藥珠篇
几案巖中自寂然
崑閬圖書藏策府
誰言孤陋解成仙

船場巖

仙艇何年插翠微
雲蓬煙櫂尚依依
凌虛欲鼓天邊柂
喚取雙龍背負飛

雞窠巖

磔磔天雞啼曉烟
仙家風景鎮芳妍
自從綵翼飛仙後
只有遺棲寄嶺巔

仙機巖

雲去仙機杼袖空報章何日已成功
天孫織就烟霞錦
吹落溪山夕照中

折筍巖

玉府鏘鏘玉筍林誰將移種翠巖陰
爛斑猶帶當時籜
照水籠烟幾百尋

仙竹

陰崖翠竹自檀栾瘦節疎枝特地寒
雖未化龍歸洞府

正宜和月掃天壇

泛舟至晞真館遇雪

行到清溪六曲頭
森然峰岫照人幽
雪花拂水輕輕舞
石瀨依巖淺淺流
不盡清光常在目
未窮幽興且回舟
追尋欲遍神仙窟
須向他時卜再遊

訪李道士

誅茅獨占溪一曲
時有白雲來伴宿
自言身在此山中
暮暮朝朝看不足

記舊夢

余今夏夢乘舟行亂石間四顧峯巒奇秀如玉色
者覺頗異之及謫官劔浦道武夷山小舟沂流水落
石出遍覽勝槩至晞真館雪作巖石皆白恍如舊遊
然後信出處之分定而斯遊清絕已先兆於夢寐雖
欲不到不可得也作小詩以紀其事

清夢先曾到武夷玉峯積雪倍幽奇小舟遊罷尋歸路
恰似脩然夢覺時

題棲真館三十六韻

武夷古洞天奇峯三十六一溪貫羣山清淺縈九曲溪
邊列巖岫倒影浸寒綠翩如鸞鳳翔矯若虬龍蹙樓觀
聳穹窈屏幃互重複蛻仙骨遺金遊女肌削玉雞棲層
巖巔船插斷崖腹學館存几案仙機餘杼柚嵐光瑩徹
潭虹影掛飛瀑翠竹陰天池蒼苔封石屋繪禽頂長丹
遺跡指如掬峨峨天柱峰幔亭連翠麓傳聞武夷君嘗
此會仙俗飛橋幾千丈絕頂亘山足障以翠雲屏藉以

紫霞褥瑤鐫傾沆瀣玉豆脯麟鹿仙妃奏賓雲金鼓間
絲竹酒酣歌夕暉歎息光景促曾孫誰復在往事空遺
躅至今風月夜笙簫響虛谷地靈饒泉石山潤秀草木
坐使七閩人蔭此仙靈福嗟予真散材性愛山水酷仙
經與地志名字久已熟薄宦方區區仙骨宜碌碌神遊
先夢寐幽覲寄圖籙寧知因謫宦乃得厭所欲沿沂窮
幽深應接勞耳目開襟豁懷抱壯觀慰幽獨却邀白雲
歸伴此巖下宿夜寒夢魂清曉發輕裝速仙遊須再來

何當謝羈束

劍浦道中

此去平津路匪遙
嶺雲溪雨自蕭蕭
山深瀉澗泉長響
地暖凌寒草不凋
放逐却教窮水石
登臨因得狎漁樵
誰憐澤畔人憔悴
更把騷詞賦大招

春詞

余謫沙陽寓居興國佛祠寢西小軒
春至梨花盛開
玉雪可憐修篁嘉木幽禽百轉
每晨坐讀書午睡初

醒把酒寓目慨然感懷因成春詞以紀景物可以興
可以怨庶幾乎詩人之旨覽者無誚焉

幽禽百轉舌如簧院宇深深花木香飄泊傷春惟泥酒
不知林外已斜陽

誰使鳴禽自在啼感春端似惜芳時一枝暫寄休饒舌
靜處須防挾彈兒

桃花零落逐風飛地上紅多枝上稀春色陡然歸艷杏
梢頭還欲銜芳菲

梅花

寒梅幾樹開前村靚粧綽約歸仙魂橫斜影落石谿淺
皓潔色洗烟嵐昏幽香暗動松竹徑清格自羞桃李園
窮冬萬里霜雪積獨得一點陽和溫冰姿最宜夜月白
玉彩更炫朝霞暎明妃失意去朔漠阿嬌無寵局長門
芳容寂寂誰復顧雅意耿耿今何言天涯相對且相樂
爲爾吸盡黃金罇

春雨

春晚雨聲碎天深雲影低蕭蕭度遠岫脉脉漲前溪芳
潤歸花蕾清寒作燕泥池塘夢生草碧色已淒迷

春意

春鳥窺綠窻踏落庭前花美人爲之笑鬢脚風中斜不
惜花踏殘只愁鳥驚去姹姬背人飛林深無覓處

春晝書懷

春院沉沉晝掩關坐看雲起面前山靜中圖史尤多味
身外功名已厚顏匣硯細磨鸚鵡眼茶甌深泛鷓鴣斑

簿書粗了無餘事更有何人似我閒

次韻志宏見示春雪長句

百花爛漫如冶容頗訝陡然春色濃那知忽作三尺雪
草木洗盡羣芳空六英飄舞片片好誰與刻削嗟神工
溪山恍在玉壺裏樓觀飛出瑤臺中却憐極目皆皓素
不復零落傷殘紅幽人栩栩應夢蝶落絮漠漠方黏蜂
虛堂兀坐清入骨欲期汗漫遊鴻濛剡谿訪戴久寂寞
安得一御冷然風年來端恐詩道窮幸子佳句時爭鋒

客愁已劇更賦雪半夜吟苦天地白

志宏以牡丹見戲呼牡丹爲道州長詩以報之

我昔驅車遊洛陽正值名圃開花王嫣然萬本鬪妍媚
雕檻綽約羅紅粧風枝似響湘浦珮露苞如浴驪山湯
乍驚照眼國色好更覺撲鼻春風香鞵紅檀點玉版白
細葉次第舒幽房玉奴纖指尚餘捻鶴翎坐恐隨風翔
就中品格最奇特共許魏紫並姚黃千金不惜買一醉
少年渾欲花底狂歸來試作牡丹譜未服秉筆惟歐陽

自從游宦多感傷況此遠謫閩山傍諦觀世味如嚼蠟
惜花未免猶膏肓亦知春色到庭戶不見此花如未嘗
予於何處得一本贈我意厚誠難忘戲言劍浦此為最
聊試呼作道州長化工雕刻無厚薄地氣培植非其鄉
雖云單葉不入品無那富艷踰羣芳願言愛惜勿嘲笑
且醉玉斝酬春光

戒酒

吾初不解飲涓滴莫下咽自從遊宦來稍稍頗稱善譬

猶怯懦士習慣亦能戰作氣欲吞敵賈勇乃求殿迂愚
嬰重疊飄泊旅異縣懷家路迢迢惜春花片片澆愁欲
千鍾燕客卑九獻浩如鯨吸川無那浮壺箭歡然偶過
量淺狹誠易見噎嘔九歲翻昏瞶兩目眩宿醒味猶惡
累日不欲膳吾生如浮漚急景若奔電學道貴清虛為
文欲精練胡為事杯杓無乃廢筆硯先生一石醉待詔
三升懸枕麪與藉糟自汙何足羨從今梁谿翁無復醉

鄉願

巖桂

閩山氣候真不常，浪蘂浮花渾欲狂。
團團巖桂著春雨，擢秀不待秋風涼。
微舒嫩葉玉剪碧，巧綴碎顆金排黃。
木如犀理自堅緻，噴作十里旃檀香。
沙陽滿眼皆此樹，安得白露零清商。
芳根端可伴真德，他日移植梁溪傍。
志宏送巖桂並惠長篇求予賦詩次韻答之

我來閩嶺值春月，坐見園林花競茁。
殷紅枝上破胭脂，嫩白梢頭開玉雪。
平生苦吟緣愛奇，對花豈忍都無詩。

愧將拙句寫天巧但把濁酒酬春暉邇來巖桂花尤好
亂綴黃英向青昊非時似欲鬪羣芳草木無情亦相惱
桺欄送花來覓句端恐梁谿得歸去謫官且作九年期
家在天涯那復顧何時萬里吹秋風清香伴此金芙蓉
臨風一醉百憂散看子揮毫如彩虹

寄內

南遷道遠不相攜錦字還嗟雁到遲玉臂雲環同夜月
繡屏金鴨獨香帷諸兒應解勤修習稚子遙憐弄喔咿

何日得歸成隱志
孟光舉案定齊眉

戲成短歌從志宏求芍藥

東風不隔沙陽僻
嫩藥濃花自春色
枌櫚也是可憐人
每送梁谿慰愁寂
邇來芍藥已盛開
供花未到吾須覓
賦梅豈害廣平剛
乞醯更覺微生直
為將爛漫數枝紅
伴我淋漓一丸墨

志宏供勺藥且以詩來再賦前韻

誰道心閒緣地僻
夢裏何嘗有空色
小窻一枕覺來時

燕語鶯啼春寂寂忽思春盡芍藥開賦詩試與幽人覓
短篇纔去花已來却愧詩詞太狂直嫣然數朶玉樓春
何似江南稱落墨

子美

杜陵老布衣饑走半天下作詩千萬篇一一干教化是
時唐室卑四海事戎馬愛君憂國心憤發幾悲咤孤忠
無與施但以佳句寫風騷到屈宋麗則陵鮑謝筆端籠
萬物天地入陶冶豈徒號詩史誠足繼風雅嗚呼詩人

師萬世誰爲亞

太白

謫仙乃天人薄遊人間世詞章號俊逸邁往有英氣明
皇重其名召見如季綺萬乘尚僚友公卿何芥蒂脫靴
使將軍故自非因醉乞身歸舊隱來去同一戲沈吟紫
芝歌緬邈青霞志笑着宮錦袍江山聊傲睨肯從永王
璘此事不須洗垂天賦大鵬端爲真隱子神遊八極表
捉月初不死

六月十八日同陳興宗鄧成彥鄧志宏早會凝翠閣晚遊泛碧齋

高閣凝空翠虛齋泛碧川
七峯連秀色萬戶鎖青烟
風物悲遊子登臨集衆賢
伊蒲羅淨供香霧縹芳筵
嗜酒陶元亮狂吟白樂天
嫩菱披紫角新荔擘紅圓
文字真清飲溪山結勝緣
畫橋橫蟬蛩繡嶺卧蜿蜒
落日生氛靄移舟信泝星
河光耿耿風露氣涓涓
山吐三更月人遊半夜船
亂螢行熠燿宿鷺立聯拳
盡興忘歸櫂銜

杯約倒蓮東槎疑犯漢御氣欲登仙但有詩千首何妨
謫九年深慙二三子陪從亦蕭然

十六日泛舟

小雨破殘暑移舟佳致多烟嵐遠增翠雲水暮相和散
綺霞依日搖金月委波勝遊非易得不飲欲如何

次韻湖陰曲

王敦舉兵明帝微行視其營壘由是樂府有湖陰曲
而亡其辭溫庭筠製詞以補之東坡書以遺秦少游

客有出以示余者因效其體次韻和之

繡鞍玉勒黃金鞭躍馬直入無王錢繞宮三匝人不識
天風翻動旌旂鮮賊臣晝寢倉黃起夢裏陽烏光照水
追風鐵騎去非遲真主那從賊中死寶鞍傳玩日淒淒
行遠不聞天馬嘶千金安用試虎口將帥何如思鼓鞞
西南大星寒有鉞晝衣繡袞垂平章九重宮殿鎖春色
豈知萬里秦城長

附唐溫庭筠詩

欽定四庫全書

兩宋名賢小集
卷一百三十八

十七

祖龍黃鬚珊瑚鞭鐵驄金面青連錢虎髯拔劍欲成
夢日壓賊營如血鮮海旂風急驚眠起甲重光搖照
湖水蒼黃追騎從外歸參索妖星陣前死五陵愁碧
春淒淒灞川玉馬空中嘶羽書如電入青瑣雪腕如
搥摧畫鞞白裘天子金鎧鉅高臨帝座迴龍章吳波
不動楚山晚花壓欄杆春晝長

次韻東坡四時詩

缺冬景

玉欄花發惟愁落風捲柳綿穿繡幕繞池烟草碧成茵

夾竹露桃紅破萼美人半醉軟香肌不語憑欄知恨誰
莫把春愁自消損且唱樽前金縷衣

深院沉沉清晝永畫屏玉枕冰肌冷轆轤驚起寶釵橫
香篆浮烟簾幙靜翠眉不為捧心顰鬢亂粧殘約畧勻
情似楊花無定處可憐金谷墮樓人

梧桐葉脫苔滋綠綺窓寂寂風敲竹笑將紅扇撲流螢
戲剪碧荷裝寶屋深沉玉宇夜長扃風露淒淒可一庭
步月清宵攜手處誰家笛作斷腸聲

荔枝詞集句

開元天子萬事足惟惜當年光景促
昭陽殿裏第一人
十幅紅綃圍夜玉夢中同躡鳳凰翎
歸作霓裳羽衣曲
沉香亭北倚闌干緩歌緩舞凝絲竹
迴眸一笑百媚生
盡日君王看不足崩騰獻荔枝
百馬死山谷一騎紅塵
妃子笑嬈好傳詔才人索絳紗
囊裏水精丸不是人間
香味色漁陽鼙鼓動地來
血污遊魂歸不得明眸皓齒
今何在金盤玉筋無消息
漢主山河錦繡中三十六宮

土花碧不見玉顏空死處淚痕血點垂胸臆

松架敞以新枝易之

日曛雨濯半飄零旋採虬枝蔭廣庭風動細香還泛泛
露滋新葉更青青雖慚剪伐勞斤斧猶勝燒燃競燭螢
涼夜蒼龍尚吟嘯坐看明月入重扃

白鷺

白鷺孤飛映碧峰皎如片雪落輕風徊翔意態雖容與
心在清波寸鬣中

次韻丹霞錄示羅疇老唱和詩

快哉善知識能以種種喻我今亦樂說漸修與頓悟頓
如草木芽荑核已完具又如大明鏡色像悲呈露漸如
雞哺雛羽翼勞覆護又如苗成實非一朝夕故邈然孤
峰頂邂逅適相遇歷歷欲親之非是夢而寤却來共談
說妙契那復選精勤假修習即得無生趣清淨摩尼珠
初無塵垢汙圓成一滴水豈殊千里雲妙藥須對治能
起膏肓痼欲觀皎日輪當去漫天霧鐵輪頂上旋不復

有驚怖劫火洞燃時自有安身處了茲一大事餘外復
何顧庭前栢樹子古廟香爐去孤雲與野鶴何往不可
寓返觀生死海便是涅槃路並化示全身達磨攜隻屨
證道坐菩提降魔成露布乃知費千談不若行一步丹
霞真道人願力極堅固眼從慧中得法乃佛親付足馬
與單鎗縱橫自馳騫願見緣未合臨風增景慕何以寫
余懷繼此龍津句

次韻和李太白感秋

秋風從西來敲我庭下竹夜涼月窺罇清光如可掬風
月豈故人萬里慰愁獨披衣從之游更欲邀共宿泠然
洗我心耿耿安用卜三十八年非庶以不逮復俯仰天
地間平生皆可覆一醉夢還家黃梁猶未熟

中秋望月次玉局翁韻二首

明月如玉盤飛上青霄東徘徊斗牛間照我禪室中爽
氣藹亭戶清光透簾櫳我雖不解飲敢辭玉罇空舉酒
對明月起舞聊相從身世兩翛然如遊廣寒宮夜久風

露冷草根吟候蟲咽咽不能已豈自鳴其窮天涯多霧
雨好景誠難逢哦詩不成寢頗類魚噲喁

皎皎月華白寥寥秋氣清念我方遠客步月庭中行風
露感我心淒然入重扃誰家弄橫笛巧作斷腸聲獨酌
一壺酒對此千里明人生但自適何必四者并醉眼視
萬物擾擾如浮萍得喪何足道譬猶陰與晴節義重太
山富貴鴻毛輕我心與明月照見萬古情

又次韻中秋長句

欽定四庫全書

兩宋名賢小集
卷一百三十八

五

涼風吹空明月高，清光萬里見秋毫。
銀雲櫛櫛方解駁，河漢掩映如波濤。
須臾掃盡無多子，天影悠悠碧於水。
冰輪正午久停鞭，羣動寂然聲不起。
諦觀此月真跳丸，山河倒影如蛇蟠。
桂花耿耿已澄潔，秋氣泠泠增清寒。
前年望月都城汴，只愁風雨中宵變。
一杯相屬有親情，側耳歌樓聞鼓板。
今年望月沙陽山，照我心如鐵石堅。
美人千里共明月，遙聞閨中只獨看。
空庭步月更幽好，白露漙漙濕烟草。
開編况讀古聖賢，發憤忘憂不知老。

男兒本自甘賤貧富貴名傳能幾人題詩對月到日出
錦囊何似龐眉客

桃源行

桃源之事世傳以爲神仙非也以淵明之記攷之特
秦人避世者子孫相傳自成一區遂與世絕耳今閩
中深山窮谷人跡所不到往往有民居田園水竹鷄
犬之音相聞禮俗淳古雖班白未嘗識官府者此與
桃源何異感其事作詩以見其志

欽定四庫全書

兩宋名賢小集
卷一百三十八

三十二

武陵溪水流潺湲漁舟鼓枻迷汴汭窮路盡恍何處
桃花爛漫蒸川原花間邑屋自連接雲外雞犬聲相喧
衣裳不同俎豆古見客驚怪爭來前殺雞為黍持勸客
借問世上今何年自從秦亂避徭役子孫居此因蟬聯
不知漢祖以劍起况復魏晉稱戈鋌殷勤留客不肯住
落花流水空依然淵明作記真好事詩人粉飾言神仙
我觀閩境多如此峻溪絕巔難攀緣其間往往有居者
自富水竹饒田園耄倪不復識官府豈憚黠吏催租錢

養生送死良自得終歲飽食仍安眠何須更論神仙事
只此便是桃花源

秋思二首

朝來秋色高西山有爽氣開軒遠相望自得靜中意那
知宋玉悲肯灑楊朱淚逍遙天地間俯仰可無愧

秋雲淡無依晶晶映寒日卷舒誰使之聚散在倏忽出
岫本無心行空寧有蹟功成歸何方妙用藏於密

傳畫美人戲成

欽定四庫全書

西華名醫小集
卷一百三十八

美人顏色嬌如花
鬢髮光翳朝陽鵷
玉釵斜插翠眉蹙
豈亦有恨來天涯
畫工善畫無窮意
故把雙眸剪秋水
丹青幻出亦動人
况復嫣然能啓齒
年來居士心如灰
草戶金鉗擊不開
縱教天女來相試
虛煩雲雨下陽臺

傳畫忠義圖

君臣以道合言出心莫逆膏澤下於民
美化施無極中世此道衰言如水投石
義士以死爭直諫或有益折檻制留今
斷鞍事存昔當車血污輪伏蒲涕霑席
昭然貫

日誠屹爾迴天力誰將丹青手圖此忠義跡傳之置坐
隅能使懦夫激斯人不復見壯哉古遺直

得家信淮南飛蝗渡江入浙歲事可憂感賦

聞說飛蝗起自淮勢如風雨渡江來吾家歲事何須慮
只恐人言不是災

乘泛碧齋至北溪口觀新橋與興宗志宏分題予
得泛字

秋高氣倍清夜靜舟初泛露華皓如洗月色寒可鑑林

巒與邑屋左右入軒檻晶熒星影搖崑崙山光蘸風微
烟冪冪溪遠波湛湛端疑客乘槎坐使雲河犯觀梁且
停橈戀月愁繫纜景幽費模寫思妙造古淡吾方久於
此勝賞豈云整願同二三子險韻時得探

志宏得碧字以詩來次其韻

明月照清溪影落千尋碧輕風皺微瀾蕩漾搖金色相
攜理桂楫及此萬籟寂天空露氣寒棲鳥正縮瑟何人
起秋思數弄月中笛坐使遷客情悽然感故國清遊得

英俊勝賞飽泉石豈殊在吾家親戚款於側賦詩各言
懷險韻對勅敵歸來氣未衰開匣看三尺

凝翠閣晚望二首

白蘋紅蓼滿汀洲浙浙西風古渡頭寒日無情又西下
溪清不語只東流

白雲點破亂山青影落寒谿晚更明誰謂天涯無雁到
雖雖初聽兩三聲

秋意

卷一百三十一
蕭蕭南浦白雲秋
楓葉蘆花相對愁
何必仍窮千里目
亂山凝翠滿溪樓

得了翁書并寄石芝云其味初淡中苦已而發甘
鮮有知此味者感而賦詩

海日氣射蒼崖根石上生芝乾
鮮文懸梯採掇資好事
中有至味難爲言
豈惟食淡兼攻苦
嚼蠟茹荼多欲吐
清甘徐發齒頰間
漱以寒泉如飲乳
幽人贈我意已深
一掬可比千黃金
世間此味知者少
往往既吐還追尋

我欲持之獻君子自古至言多逆耳願於苦處辨忠良
若待回甘真晚矣

兩宋名賢小集卷一百三十八

欽定四庫全書

兩宋名賢小集卷一百三十九

宋 陳 思 編

元 陳世隆 補

梁溪集下

次韻和歸去來集字

以後自沙陽放還作

予初抵沙陽嘗和陶淵明歸去來辭然竊意歸期未
可以歲月計也近聞例許牽復真得歸矣偶讀玉局

翁歸去來集字因次其韻簡諸弟七首

少負丘壑志誤嬰軒冕榮剛腸難隱忍懶性倦將迎學
佛欣自得謫官知物輕悠悠勢利子千古見交情

壯志已衰落頽然成懦夫編須休虎穴曳尾且龜塗松
菊猶可理田園將欲蕪親朋悅情話濁酒任傾壺

軒冕豈足戀田園誠可歡村村自花柳物物寄遊觀舊
事不可憶吾生良易安南窓審容膝歸去學鯢桓

曠蕩推新澤迂疎念昔非休為賈生賦且治老萊衣報

國撫長劍懷親歌式微憑高望吳越千里白雲飛
寤寐在親所得歸欣載奔綵衣猶在笥素髮已垂門遣
興詩千首忘憂酒一樽歸與理三徑松菊故應存
舊隱北山北結廬猶可尋曾傳種松法當遂採芝心有
酒且觴客無弦何用琴一生幾兩屐慎勿廢登臨
處世若大夢吾生感行休何須縛軒冕且復傲林丘雲
木千巖秀烟波萬里流忘機齊物我魚鳥與君遊

奉酬陳之元教授見贈次韻

謫官因得窮林泉陶寫聊復資詩篇青岑疊疊山滿眼
碧波湛湛溪涵天南連海嶠饒霧雨北望吳越淒風烟
感懷觸目還得句但可娛戲那敢傳譬猶候蟲與時鳥
自鳴自己真偶然豈知飄落廣文耳節以妙語煩雕鐫
與公平生未相識一見傾心誰與易沙陽百里阻遊從
注目寒空暮雲碧竭來邂逅慰所思况得新詩飛霹靂
我今歸去隱梁溪遠跡江湖養愚直看公白日上青霄
九萬扶搖不勞力

題黃亭驛

雲山一帶碧崔嵬迎我南遷又北迴
歲籥才周兩經歷此行端爲武夷來

武夷行

宣和改元之夏予備員左史寓直東省晝寢夢遊武
夷山未幾謫官閩中取道山下果符所夢因作賦一
篇古律詩近五十首今冬蒙恩北歸復尋舊遊泛遊
仙谿登換骨巖致祀十三真君會食觀妙堂因盡錄

前所作遺觀妙法師且別賦一篇以述再遊之意目
之曰武夷行

憶昨退朝門下省槐陰扶疎清晝永瑣牕一枕夢仙山
覺來毛骨猶清冷謫官道出武夷山風景脩然似夢間
碧溪九曲山萬疊况值密雲捲烟鬟寬恩今日容歸去
笑指洞天尋舊路霜晴日暖白雲深遙望幔亭天一柱
羽人導我遊仙溪翠壁蒼崖晚更奇浩歌快飲縱迴櫂
星月耿耿風淒淒曉來換骨巖中看玉潤金堅餘片片

三妹駢立映彤霞二水交流縈素練征鞍欲去更從容
仙境靈蹤豈易逢他日追思不可到夢魂還過七閩中

自分水嶺過江南

行盡關山萬屈盤江南形勢陡然寬山平水遠望不盡
木落草枯霜始寒醉裏謳吟聊自適夢中往復本非難
誰言春信年年早笑指江梅試折看

望龜峰

饒陽景物猶武夷巖石崛起多瓌奇此峰厥狀更詭異

舉首曳尾如靈龜穹窿曝甲正霜曉蹢躅引氣當晴暉
故知造化巧凝結欲問所以良難推我疑龍伯釣溟渤
六鼇連引背負歸中途遺一尚鼇屬直欲赴海冠我鬼
又疑清江使河伯波濤相失留於斯化為巨石峙千古
雖欲鑽灼無由施茫茫神怪不可詰但使風景增清輝
我來閩嶺厭山水見此還復伸雙眉頗嗟行役不果到
側身西望生長思

江行七首

池陽至銅陵

理權適江干初欣眼界寬日蒸江氣白風約櫓聲寒蔣
詡謀新徑鍾儀只舊冠浮雲休蔽日直北是長安

春江徹底清沙尾見潮生朝氣噓成霧南風戰作晴岝
移看樹遠船穩信波平覽盡江山勝還悲萬古情

渺渺春江穩融融午睡腴夢回雙艣急望極片帆孤皺
水風還逆維舟日欲晡雲間有行雁冉冉下平蕪

春光搖畫鷁江影浸長天浪勢隨潮急渦痕逐艣圓避
風依島嶼防寇問人烟深念還愁絕高歌且醉眠

朝來問風俗五兩向南飛旅泊愁春恨舟行與願違
疏梅空的的岸柳已依依寂寞江南路那知自此歸

春江望不極慘淡起層陰烟雨濛濛濕雲濤渺渺深懷

家千里意報國一生心嘆息知音少空為梁父吟

杳杳楚天濶悠悠江浦清便風帆腹滿順水艚腰輕烟
淡山逾碧雲高雨易晴無心問漁父濁酒慰平生

銅陵阻風

春色到江渚梅花正斷魂風波留遠擢烟雨濕寒村雁

過傳遺響潮來沒舊痕淒涼一尊酒愁絕與誰論

題護法寺瑛老默堂

維摩丈室何年設滿目江山自風月道中試露默中機
千偈瀾翻本無說

自銅陵行四十里風復作泊江北岸地名散潭屬
淮南

鏡中漸覺鬢絲多半世勞生可奈何極望不來青足鳥
滿江更起白頭波揚帆賈客風前笛撒網漁人月下歌

自斷此生甘寂寞毗耶歸作老維摩

夜坐二首

春夜沉沉燈影明卷書兀坐忽三更不知船外風多少
但聽滿江風浪聲

波濤漠漠雨紛紛夜泊江南烟水村慨念平生都不寢
可憐心事向誰論

次韻和淵明形影神三首

形贈影

大塊已載我何如未生時氣變芒芴間七竅誰鑿之百
骸與九藏假合以成茲與子非故交從我如相期屈伸
及動止契合初不思常恐隨物化念此情淒淒我生夢
幻中變滅不復疑安得永相保聽我悲來詞

影答

紆餘非我妍蘗落非我拙與子兩相依生來無間絕俯
仰隨顧指豈是事容悅因光長周旋處陰暫睽別况復
同物化子壞我亦滅冥冥長夜臺念之五情熱願子衛

生經無使精腦竭千載永相從彭殤孰優劣

神釋

人生若大夢積微以成著少壯得老死一念即非故二
子異金石松蘿暫依附胡爲羨久生切切兒女語有形
會當滅是影無實處惟我謝容塵妙湛乃常住不入造
化機豈墮陰陽數迴光試返照凡聖悉皆具不滅亦不
增誰毀復誰譽超然外死生卓爾無來去周行萬物表
獨立初不懼二子非吾徒安用多憂慮

雙鳧

雲濤萬頃連天雨波上雙鳧自容與風高江濶烟水寒
日暮相將何處去

次韻茂載海陵寓居有感三首

羣盜休憑險天弧正指狼沙蟲徒跋扈貔虎極精強寓
目江山異傷心花草香浙河那得此回首一徬徨
江城漂泊久幽徑綠寒莎歎息青春暮悲傷白髮多蒼
生端若此狂寇竟如何更起乘槎興滄洲萬里波

不謂繁華地還飛戰鬪塵澆愁空泥酒極目更傷春懷
古緇書帙論情托友人誰深醫國術吾欲問甘辛

贈虞公明察院

寓居海陵初欲問道每見輒為碁戰所因此殆曹參
陽城醉客以醇酎意臨行作此詩庶幾發藥

堯峯古城隅下為鳳凰池鳳去不復返池水空連漪傍
有幽人廬松竹森四圍結構極爽塏借問居者誰先生
聞道久昨自海上歸食棗大如瓜定曾見安期不知修

何術能奪造化機金鼎燦含葩玉池灑生肥顛倒出龍
虎騰降分坎離行年五十餘氣貌如嬰兒餘暇分圖史
不廢酒與詩高堂會賓友落筆風雨馳戲事聊復爾一
笑初何為懸知廣成子千歲形不衰顧我抱迂拙與世
真相違徒欲睇驥驂曾未窺藩籬寓居邇函丈數造董
公惟願聞衆妙門成此一段奇胡為久閉拒客至輒圍
碁歸隱志已定後會知何時銘心逝相學發藥幸教之
他年倘有得同駕雲中螭

自海陵泛江歸梁谿作

清江湛湛波不興澄江際天如鏡平火雲突兀聳峰岫
倒影萬丈搖空明扁舟歸逐落潮急聒耳但聞雙艫聲
乃知長江無六月水氣自與風兼清去年狂寇起歎睦
江浙慘淡妖氛凝百年涵養極繁盛一日蕩析屯臊腥
衣冠北渡旅淮甸扶老攜幼分縱橫王師出討盛貔虎
兇渠投首封鯢鯨迨茲浙右稍安定鼓枹復作東南征
家山在望已可喜僮僕候我應歡迎平疇戢戢稻秧綠

峻嶺靄靄松竹青田園有趣良足樂軒冕無味非所榮
蒼生倘有安堵望笑傲可自終餘齡只今餘孽尚充斥
努力廟算宜哀矜裹包兵革不復用坐使四海還康寧

次韻上元宰胡俊明蔣山勤老唱和古風

竺教流傳入中土以相求之無自可達磨西來直指心
擬議之間已蹉過皮髓誰分深淺機祖禰翻貽子孫禍
鍾山禪老真可人高唱宗風震江左學流雲集欲何為
佛祖要須自心作宰官恁恁牒訟間偷暇相從還作麼

也知襟抱素相親更把篇章迭酬和詞嚴義密讀難曉
字順文從識皆妥應憐孤陋方杜門亦欲追隨良未果
故將佳句寄幽人此意勤渠滋愧荷談空摩詰無一言
聽法文殊非兩箇若將情解議真如明眼人前應看破
世間萬法互低昂正若旋輪與推磨隨時俯仰乃善謀
就中拙者無過我九折羊腸欲著鞭萬里滄溟思縱柁
只今行年四十餘已覺衰頽多坐卧平生作具何所施
盡已付之一弄火迴光返照默自參妙湛本然無點泥

公方齒壯志氣豪正可立功同魏顆胡為亦復味禪那
坐視軒裳如繫鑠蓮社莊嚴清淨池丈室含容高廣座
他時共結香火緣心期耿耿當非頗為余稽首問勤師
如師材德誠磊砢釣龍羅鳳大江濱法器誰為語無墮
庭前倘有立雪人我欲因風致三賀

得吳元中書言近不作詩以所著幽七月詩義見
示因成一篇贈之

儒生樂事信同風端把前言當鼓鍾公正說詩箋七月

我方學易緯羣龍艱難盛業原衣食憂患餘生問吉凶
去聖寥寥千載後何時揮麈得從容

題伯時明皇蜀道圖

君不見開元天寶同一主治亂相翻如手舉桴盈欲惡
雖一人變易安危原近輔姚宋已死九齡黜誰使楊釗
繼林甫宮中太真專寵私塞外番酋成跋扈禍胎養就
不自知漫向清華遺七筋漁陽突起破潼關百二山河
震金鼓翠華杳杳幸西南赤縣紛紛集寇虜傷心坡下

失紅顏墮淚鈴中間夜雨山青江碧蜀道難棧閣連空
懷相挂旌旂慘淡雲物愁林木陰森猿鳥侶戎裝宮女
亦善騎皓齒明眸猶笑語老髯奚官驅蹇驢負索齋糧
豈供御九重微衛復誰勤萬里艱危真自取至尊狼狽
尚如此歎息蒼生困豺虎千秋萬歲不勝悲玉輦金輿
盡黃土空令畫手思入神一寫丹青戒今古

題邵平種瓜圖

君不見伯成子高讓侯爵在野終年自耕穫下風趨問

禮徒勤俛俛田間事無落又不見於陵仲子推相位爲
人灌園刈葵藿抱甕區區同漢陰不糝藜羹有餘樂古
來賢達有如此志趣未可常情度力辭富貴居賤貧凜
若霜風隕輕韉召平本是侯東陵秦破國除丘一壑當
時漢祖疑鄼侯置衛增封意非薄衆賓皆賀平獨弔一
言轉禍推先覺以茲智畧佐風雲復取故封何所作歸
來種瓜青門外灌溉鋤耔甘寂寞長安之東壤尤美翠
蔓離離照城郭秋陽正曝瓜正肥解衣摘實如俛鶴兒

童玉立形骨清挈笠攜筐助操作遂令世美東陵瓜身
後高名動寥廓屠販曾聞封絳灌奴僕後來興衛霍高
鳥已盡良弓藏更有韓彭辱囚縛何如終老守瓜畦自
飽飽他真不惡龍眠也是可憐人畫此端令事如昨世
間如畫畫如夢聊為作歌資一噓

唐植甫左司許出示所藏紅絲硯輒成短歌奉呈
并簡顧子美

羲和整御升暘谷赤雲夾日如飛鷺晶光下射東方山

石卵含丹孕巖腹誰令巧匠鑿山骨截此頰堅一肪玉
琢為巨硯形製奇中有彤雲爛盈目端溪美璞色馬肝
黥歛珍胚紋霧縠豈有至寶出岵夷散綺浮花彩尤縟
鳳味空聞名字佳龍尾苦笑規模俗漫誇眉子鬪嬋娟
休認明眸類鸚鵡顧盼幸蒙君子知拂拭自遠塵埃辱
火輪炫煥赤烏流墨海奩淪玄兔浴千金象管雕鏤精
百煉松煤龍麝馥怒猊渴驥縱奔擎春蚓秋蛇相縮束
楮生便覺肌理妍毛穎何嘗免冠禿公家三世擅直聲

此硯提攜資簡牘力侔天地掌中迴膽落奸諛筆端戮
固宜祕玩不輕示神物護持無輒黷寔明几淨齋閣深
日暖風清霽松竹試將墨妙寫新詩落筆烟雲嘆神速
矧公早年曾餌丹龜鶴精神鬢毛綠久卧商山茹紫芝
行度天門騎白鹿倚蘭玉樹富堦庭黃卷青緗賸編軸
願言十襲遺雲仍大筆高文永相續

次韻子美提舉許雪中見過之作

殘臘苦寒情味惡萬里風雲欣雪作夜積端愁坤軸傾

曉望却驚天界廓玉龍鱗甲卧羣山冰海波瀾凝巨壑
謝家兒女自多才笑詠飛花度羅幙金爐未覺獸炭溫
錦帳猶訝貂裘薄書生飢甚况復寒坐聽朱弦折臨嶽
松孤竹老念山林甲冷戈寒憫沙漠豈思龍尾賀千官
且疊琴心舞雙鶴瑤林玉樹粲迴環勿謂軒庭全冷落
擁門但作袁安卧命駕誰思子猷樂溪山如畫真自知
金玉滿堂端不博煩公攜具款我門注目遙空登晚閣
凍吟猶作號寒聲此病欲醫那有藥公家故自富香醪

我亦安能辭巨杓醉看萬事雪銷凝妙觀圓成不須學
寄毛達可內翰并錄送魏公別錄

迂愚聊復隱清時幽事相關只自知滿地落花看鶴舞
一軒春雨對僧碁閒中日月真銷得物外烟霞漸可期
坐致時康賴公等不須深遜採商芝

同似表叔易置酒平山堂

暫停征權此從容嘆息前賢結構雄心眼乍隨天宇濶
笑談不覺酒尊空江光隱見軒楹裏山色虛無烟雨中

種柳仙翁何處去年年疎翠自春風

兩宋名賢小集卷一百三十九

欽定四庫全書

兩宋名賢小集卷一百四十

宋 陳思 編

元 陳世隆 補

尹和靖集

尹燦字彥明河南人父林官至虞部員外郎燦師事
伊川以德行聞靖康初召至京懇辭還山賜號和靖
處士金人陷洛闔門被害燦死復甦避劉豫聘奔蜀

止于涪紹興中召為崇政殿說書後遷禮部侍郎兼
侍講所著有論語解及門人問答

過种明逸故居題絕句

少年妄意學經綸老矣空餘此一身面似顴髯頭似雪
却來巖谷繼前塵

自秦入蜀道中絕句三首

綠陰深處竹籬遮也有紅花映白花却憶故鄉卿相第
不及張三李四家

曉來雨過槐陰潤
午霽風搖麥浪寒
自愧此身徒擾擾
未知何處可偷安

南枝北枝春事休
啼鶯乳燕也含愁
朝來回首頻惆悵
身過秦川最盡頭

亡姑墓銘詩

嗟夫人之生兮一氣凝乎混茫
變而之死兮去不知其何鄉
唯懿德之在人兮愈久而不忘
歸安此室兮其千萬年無壞傷

避賊至商山絕句

西來幾被雪霜埋
鴻鴈嗷嗷莫強猜
今朝始踏商山路
高視浮雲任去來

附錄

挽和靖先生詩

呂德元

往在伊川學他時
洙泗傳從來有高第
未覺喪前賢繆
列三千士於今二十年
山顏與梁壤淚盡會稽前

四海尊師席斯文特未衰何其兩楹夢遽使哲人萎閭
水從容意稽山疾病時勤勤付斯道矢死奉成規
垂老朝三聘生平食一簞絕知斯道在遺恨得時難廟
謹先師祀書傳後代看形容銘墓石三發喟然嘆

曾 班 朝請提宮

凜凜河南已百年維公高行繼前賢早施絳帳崇師席
晚入金華侍講筵斯道未傳今逝矣彼蒼難問竟茫然
回思昨日論交地不見牙籤列簡編

道直心無愧師嚴貌有威上方虛席待公忽掛冠歸王
室懷元老天星掩少微簪紳竟相弔奚獨我心悲

高 閑

司業


身占河南第一功力行篤信守家風淵源漫說斯文喪
深切今知此道東七日夢楹終有待三年築室恨無從
嵩伊千古溫淳氣收入稽山鑑影中

謁和靖先生虎丘祠堂詩

李道傳

陵陽人

涵養當用敬進學在致知如車去隻輪跬步不可之夫
子受師說惟敬實所持升堂遠易簣參倚日在斯遺言
落人間取論極研幾是心要收斂中不容毫釐大學著
明法格物乃階梯放心苟不收窮格將安為古人貴為
己末習多外馳豈無實踐者茲焉當孰歸晚生拜遺像
敷衽跪陳詞願言予服膺沒齒終不渝



兩宋名賢小集卷一百四十